

閩
中
金
石
志

閩中金石志卷一

嘉興馮登府輯

吳興劉承幹校

周

號叔大林鐘

汀州伊秉綬所藏

號叔旅曰丕顯皇考惠叔

穆秉元明德御于乃辟得

屯亡攸旅敢啟帥荆皇考

威儀爲御于天子卣天子

多錫旅休旅對

天子魯休揚用作

朕皇考惠叔大苓

和鐘皇考巖在上

翼在下愷愷能降旅多

福旅其萬年子子孫孫永寶用昌

阮宮保元曰右周虢叔大林鐘元所寶之器今在家廟中重六十五斤揚州太守伊墨卿亦得虢叔大林鐘一枚於秦中其文與元所寶者無一字之異特尺寸斤兩較元鐘畧輕小十分之二而右銑有鳧形爲元所無屬元釋文乃以積古齋中款識所釋錄於右方元按左傳僖公五年傳云虢仲虢叔王季之穆也

正義引賈逵注云虢仲封東虢制是也虢叔封西虢
虢公是也是鄭所滅者虢仲之後晉所滅者虢叔之
後國語韋昭注與賈逵注同虢仲後有虢叔左隱元
年傳虢叔死焉國語所謂虢叔恃勢是虢仲之後字
曰叔也虢叔後有虢仲又有虢叔桓八年傳王命虢
仲立晉哀侯之弟緡於晉是虢仲虢公林父也莊二
十年傳鄭伯聞之見虢叔二十一年傳虢叔自北門
入是虢叔之後字亦稱叔也此虢叔名旅史傳無徵
未詳何國偃師武虛谷億云周景王作大林鐘是時
虢亡已久不宜復有虢叔爲之效尤蓋其後續封也

唐書宰相世系表西虢地在虞鄭之間平王東遷奪
虢叔之地與鄭武公楚莊王起陸渾之師責王滅虢
於是王求虢叔裔孫序封於陽曲表文多舛當亦有
所據元按鄭所滅者乃東虢表云西虢誠有舛然謂
復封陽曲必有確據如楚簡王十四年越既滅鄭及
頃襄王十八年復有鄒費邾邳春秋時小國之絕而
復封者難更僕數矣元之論虢鐘如是書呈墨卿正
之以爲何如若大林之義則有江公鄭堂之說在
江藩曰大林和鐘卽國語鑄無射而爲之大林也其
法作無射爲大林以覆之其律中林鐘說見賈侍中

注無射乾之上九林鐘坤之初六上九位高聲細初
六位下聲大無射之聲爲大林之聲所抑故伶州鳩
曰細抑大陵不容於耳然則大林之鐘其聲乖于律
度必無和理而名曰和鐘者和當讀作勾股和較之
和用無射林鐘二律之和數以鑄此鐘蓋無射律長
四寸六千五百六十一分之六千五百二十四林鐘
律長六寸以無射之律與林鐘之律兩數相併爲和
耳

陳均曰丙寅之春余獲是鐘於涇陽骨董家詢其所
自云寶雞號川城所出號川周西號所封地考釋律

數已具芸臺宮保及鄭堂跋中不贅鐘有鳧形者僅見宋王復齋鐘鼎款識寓鳧氏爲鐘之義考工賈疏云族有世業以氏名官鐘以鳧銘殆如韋裘之類以官爲氏非以氏名官也鳧爲水鳥入水不沒聲貴清揚義或取是鉦間敢字下字如𠂔當是勿字非啟字曾在安定陳敏常文學家見一小鐘形製相類鉦間自號叔始至秉元十三字止左鼓自明德始至帥型十五字止反面無銘意在編鐘不倍律者比懸而文相續也此鐘以漢尺度之兩樂高一尺七寸兩鼓相距一尺八寸三分舞高六寸五分鉦高八寸三分旋

蟲高六寸五分當卽特鐘之過制者時代遙遠古律
浸漣未可臆斷矣丁卯秋日信宿六一堂墨卿先生
見而欲之卽以奉貺越六年壬申重來邗上出此冊
索題略具顛末於後

趙魏曰右鐘先見于阮氏積古款識中攷之最詳墨
卿太守復得其一蓋號叔旅推本其考惠叔明德已
復率型威儀兩世得君敷依而銘是鐘也他器旅多
訓衆讀錫休對揚語此正是名屯作攸純得所也帥
判卽率型嚴在上翼在下詩於昭之義也愷愷讀若
漢詩皚皚能能讀若山經熊熊義可通也銑有鳧協

官制猶漢制必尙方也和鐘老友鄭堂之說爲尤覈也二器同時並出悉爲名公鉅卿所藏照耀大川南北老眼得此優曇阿閼欣忭爲何如耶

右號叔大林鐘以億僦尺度之樂高一尺七寸鼓相距一尺八寸三分舞高六寸五分鉦高八寸三分旋蟲高六寸五分與阮宮保所藏銘詞無異特器略輕銑有鳧形爲稍殊耳鳧取周官鳧氏爲鐘之義景王始鑄大林號亡已久不應有此也惠字號姜敦正此字啟疑嗣之省陳均釋作勿未確旅諸家多訓作眾攷鐘鼎文每稱旅亦假作魯字

秦和鐘以受屯魯多釐董道曰魯古文旅書序公
既得命禾旅天子之命史記作魯天子之命漢有
旅鼎卽魯鼎是也此鐘下文云魯休則旅當是虢
叔名也刑法之制从井刑剄之刑从开莖卽型字
帥率之假字聘禮帥大夫注古文帥作率覲禮注
今文帥爲率敢嗣帥型卽所謂儀式型文王之典
也屯純之省號姜敦屯佑通彙盟和鐘屯魯多釐
皆是攸修之省凡鐘皆以和名所謂垂之和鐘是
也江氏釋爲和較之和鑿矣此鐘得見於墨卿太
守令子念曾處四手拓一通以冠閩中金石之首

漢

甘泉宮瓦

侯官林侗所藏

林侗來齋金石考瓦頭篆長生未央四字按三輔黃圖甘泉宮一曰雲陽宮史記秦始皇二十七年作甘泉宮及前殿築甬道自咸陽屬之宮周圍十餘里漢武帝建元中增廣之週十九里師古曰秦林光宮在磨石嶺嶺側有甘泉故漢武建甘泉卽取爲名其嶺高出他山距長安三百里而能望見長安城堞更置前殿始造宮室百官皆有邸第有芝生甘泉殿邊房中漢舊儀云芝有九莖芝金色綠葉朱實夜有光乃

作芝房之歌帝又起紫殿雕文刻鏤黼黻以玉飾之
如他宮館不可勝記帝時居之漢書云烽火達甘泉
以帝時常居長安故邊警烽火兩通之也巫蠱事起
帝亦居甘泉宮成帝永始四年行幸甘泉歷今二千
餘年王迹久湮蕭相國所造未央宮舊址在今西安
城西北三四十里間禾黍離離耕夫時棄瓦礫道傍
亦隱隱有文字可見絕無完好者歲辛丑余與祝丈
光遠自三原至淳化山中憑弔故宮惟有荒煙蔓草
不意於幽僻處搜獲此瓦何異商周鼎彝近與家弟
吉人作爲歌詩以咏其事四方博雅屬而和之遂盈

卷軸其所寄慨又非一瓦已也詩多不具錄聊誌其梗概如此瓦製字形質古簡樸漢初法物世所希有爲足重也

朱彝尊臯書亭外集書林同人甘泉瓦款冊子後周秦兩漢遺文流傳於世者石刻尙多鐘鼎文差爲難得予竊藏有紹興中搨本乃畢少董購之河北樵塲每一款識以青箋疏其後亦有出於朱希真家者趙王孫子昂以燈檠刀尺諸款增益之予就目中所見摹得數十種下至景雲觀鐘銘南漢鐵塔記皆裝入冊惟辰州李宏皋銅柱銘力購之未能得也康熙戊

寅六月客福州林子同人袖甘泉瓦見示體製奇古
中央四字隸法跌宕可愛予思瓦出埏埴之工非金
非石若秦之咸陽漢之未央魏之銅雀齊之香姜類
皆有文試取而遍塌合以孔廟五鳳年甄王子敬保
母志之屬別裝成冊亦一快事歐陽子有言物常聚
于所好同人好之旣篤聚之正無難爾

徐鉉記甘泉宮瓦閩中林子同人從父宦遊長安於
亂山中得之徑五寸強厚一寸弱背平可研墨以水
漬之有翡翠紋如古彝器卽唐宋以來所謂瓦頭硯
也蓋入土歲久其質理亦溫潤可愛按甘泉宮址今

在涪化縣距長安三百餘里一日雲陽宮史記秦始皇二十七年造漢武帝建元中增廣之雕文刻鏤窮極奢侈與柏梁建章相埒今去漢已久遺跡都不可考惟當年瓦礫委棄荒煙野草中者久而未泐往往雜出於風霜兵火之餘如此瓦者字畫猶甚完好余把玩久之因思項籍入咸陽阿房既焚漢家創業宜崇節儉乃所謂長樂未央複閣飛樓千門萬戶照耀於秦山渭水間者周數十里餘卽今三輔黃圖西京雜記所載抑何盛也及至炎祚一移玉城珠簾化爲灰燼雖片瓦僅存久摧剝於樵夫牧豎之手何意二

千餘年乃得博雅好古之士如林子者長鑱木柄搜剔於荒崖殘冢之墟懷之而歸如獲拱璧裹以古錦注以名泉時復爲之摩挲寶玩俯仰太息恍若置身西京以上則瓦之所遭不厚幸也哉甲戌五月余客三山同人令弟吉人出示此瓦並摹其文示余遂爲之記

萬斯同羣書辨疑侯官林子吉人至京師示余以甘泉宮瓦圖蓋其兄同人遊其地親拾於瓦礫中者其額有四字曰長生未央古而樸其爲漢物無疑也或有問于余曰昔王子充作漢瓦硯記言未央宮瓦凡

六字其面背皆有字一日□□□□一日長樂未央
一日儲胥未央一日長生無極一日萬壽無疆一日
永壽無疆所謂長生未央者得毋僞乎予曰不然彼
所云者未央宮瓦也林子所謂者甘泉宮瓦也未央
作於高帝甘泉則作於武帝時之相去將百年未央
在今咸陽甘泉則在今涇化地之相去又二三百里
宜其制有不同也安得執彼之說疑此之僞乎子充
記謂瓦之面徑五寸圍一尺六寸強厚一寸弱質之
林子之瓦其制皆合則其爲漢物何疑或又謂未央
之瓦乃篆字此則隸字何以不同余曰隸卽今楷書

也當高帝時去秦未遠隸書止行於民間故用篆字至武帝時則朝廷上下悉用隸書故制瓦者卽用其體書之也又何疑或人稱善因題於圖後

翁方綱兩漢金石記乾隆庚寅秋方綱在廣州使廨錄士事竣侯官林道山

名琮字用郊

以其家吉人所摹瓦

文並前人題冊來示其背有同人手題曰甘泉宮瓦辛丑得之石門山中方綱旣爲賦詩並摹於硯以志之後十年庚子秋桐鄉陸畧士又見示吉人所摹製一硯文亦相同其硯側八分題曰仿漢瓦製吉人凡六字方綱於壬辰夏始得見漢建初尺以準漢器漢

泉刀無弗合者因以建初尺度此瓦正得五寸有奇
乃知烏傷王文節之記所謂面徑五寸者乃是漢尺
五寸強耳若直以今尺度之則甫及四寸安得云五
寸哉由此以推則其所謂圍一尺六寸強厚一寸弱
者皆是以漢尺度之昔郎仁寶在明代尙能考證歷
代諸尺則烏傷之見漢尺可以無疑而益見考古之
不可輕以臆斷矣

梅仙山石刻

漢

何喬遠閩書在建甯府城二里漢梅福丹成之日驂
鶴而去所乘馬及鞭從空墜下天爲降甘露焉故今

原曰甘露洲曰墜馬渡曰驂鸞坡曰遺鞭山嶺丹井
壇竈具存每秋陰井上虹光時現碑刻大漢甲子梅
福立宋守韓元吉建堂榜曰梅仙山後守李詵修復
扁曰梅山半山創亭曰驂鸞

蕭子開建安記梅福上昇墜馬於小松溪輿地紀勝
梅山在城南三里

按韓元吉淳熙中知建甯州李詵疑李詵之誤

晉

永康碑 永康元年

圖書羅源縣登高山上有晉冢三磚文曰永康元年

始改晉郡爲晉邦凡十一字

咸和磚 咸和四年

磚文一曰咸和四年太歲一曰咸和四年八月辛丑
朔口日起造似篆似隸陽文磚長一尺三寸厚二寸
旁有敘爲福州陳壽祺太史所藏

梁

萬歲寺塔鼎銘 天監四年

閩書嘉祐十三年四明屠僑來爲藩左伯由南門入
居一日雷震萬歲寺塔鼎墜地有款識曰諸天及人
無由見鼎地搖三日天雨四花土田三變今古同時

屠人握閩雨衣三拜梁天監四年書

出師頌

金石時地攷蕭子雲書在福州府學閩書作蕭子南
章草南字誤

唐

湛廬山墨刻

貞觀

王象之輿地碑目在湛廬山去溪南二十里作貞觀
石刻曹學佺名勝志湛廬山在松溪縣南唐拾遺記
以此山爲湛王鑄劍之所有冶鑪遺跡及唐貞觀中
墨刻崖上現存

謝冢磚

總章二年

在羅源縣沈厝後山道光九年二月土人鋤土得古
磚冢空穴有瓦瓶二瓦燈六磚紋有造像及執弓御
馬鏡花形冢門一磚長一尺三寸有維大唐總章二
年十月四日謝冢十三字陽文正書村人舊稱謝家
壠規制樸古惜無碑志可攷也

陳元光威烈廟記

垂拱二年

輿地碑目唐垂拱二年立在漳州

碑云公姓陳諱元光永隆三年盜攻潮州公擊賊降
之公請泉潮之間創置一州垂拱二年遂勅置漳州

委公鎮撫久之蠻賊復嘯公討之戰歿因廟食於漳
見輿地碑記郝志入名宦未詳其事

烏石山盤陀和尚真身塔記

大足元年

福州府志撰人闕

閩書盤陀山頂有古輒塔門忽裂現一真身陳公云
爲兒時見石橋上有盤陀和尚真身塔記末云大足
元年建

東山愛同寺懷道闍黎碑

開元二十五年

集古錄目云唐括州刺史李邕撰并書闍黎姓陳氏
爲福州愛同寺僧碑以開元二十五年七月立

按鄭樵通志金石略作大律故懷道閣梨碑李邕書在福州黎梨古通字按泰和元宗時左遷括州司馬開元二十三年起爲括州刺史見唐書

章仙壇碑

開元

郝玉麟通志在連江香爐山有唐開元中勅建章仙壇碑記章壽學道於此宋政和間改爲寺僧恐復爲道宮乃毀而瘞之

開元中勅書

開元

輿地碑目在連江廣化寺

封祀石刻

天寶

輿地碑目唐明皇刻石在武夷換骨巖是時遣使者祭海內名山大川登仕郎顏行爲之記

崇安縣志天寶七載歲在戊申七月封名山大川登仕郎顏行記在武夷山同亭湖畔後湖陷石墜水中

聖泉院置經略軍記

至德二載

見梁克家三山志

黃畚廟記

廣德二年

復齋碑錄云唐吳安世撰并正書廣德二年六月初三日立寶刻叢編在建州

石敢當石刻

大厯五年

輿地碑目在興化軍

劉斧青瑣高議張緯慶厯甲申以秘書丞宰莆田再
新縣中堂治地得石銘文曰石敢當鎮百鬼壓災殃
官吏福百姓康風教盛禮樂張唐大厯五年四月十
日縣令鄭押字記得銘之日乃皇宋慶厯五年四月
十日也白唐距今幾三百年物之顯伏固有時至於
年號月日昭若符契異哉

按張緯慶厯間知莆田見郝志大厯間莆田縣令
鄭志失攷

般若臺大篆
大厯七年

金石錄云唐李陽冰篆大厯七年立

諸道石刻錄云在神光寺石壁上大字二十四字般
若臺大唐大厯七年著作郎兼監察御史李貢造李
陽冰書小篆徑一尺按般若臺三字下有住持僧惠
攝五字正書

輿地紀勝記刻於華嚴巖頂與處州新驛記緡雲縣
城隍記麗水忘歸臺銘世寶之爲四絕

顧炎武金石文字記閩中絕少石刻惟此銘在三山
爲最古

按金石錄云陽冰在肅宗朝所書時年尙少故字

畫疎瘦大厯以後諸碑皆暮年所篆筆法愈渾勁
此書署大厯七年正晚年筆也

成公李椅去思碑 大厯十年

獨孤及撰見郝志

世與道交相興喪宏之者在人非庚桑楚不能使畏
壘穰向化微文翁蜀學不崇閩中無儒家流成公至
而俗易民賴德施古今一也初成公之始至也未及
下車禮先聖先師退而嘆室堂湫狹教學荒墜懼鼓
篲之道疑子矜之詩作我是以易其地大其制新其
棟宇盛其俎豆俎豆既條乃以五經訓民考教必精

繼誦必時於是一年人知敬愛二年而學者功倍三年而生徒祈祈賢不肖競勸家而洙泗戶有鄒魯僖風濟濟被於庶政大厯十年歲在甲寅秋九月公薨於位於是羣吏庶民耆儒諸生雨泣廟門之外若有望而不至號曰豈不欲斯文之漸漬於東甌之人歟不然何錫厥化而不遐公之年也吾黨瞠然嗚呼曷歸膳部員外郎兼侍御史安定皇甫政殿中侍御史潁川韓贄監察御史河南長孫繪率門人部從事州佐縣尹相與議以公之功績明示後世謂及嘗同司諫之列宜備知盛德善政見托論議以實錄刻石曰

公諱椅字某皇帝之諸父宗室之才子寬裕愷悌孝
慈忠敬莊而成式文而強力治王氏易左氏春秋酌
其精義以輔儒行故居處執事著書屬詞非周孔軌
躅不踐也天寶三載應選辯論爲安陽縣尉中興之
後歷御史尙書諫議大夫給事中十餘年周歷三臺
言中彝倫動中大本上交不諂下交不瀆家貧不樂
清苦求爲京兆少尹無何出守宏農又移典華陰兼
御史中丞華陰之近者安遠者來天子以爲才任四
岳十二牧之職大厯七年冬十月一月加御史大夫
持節都督福建泉汀漳五州軍事領觀察處置都防

禦等使八年夏四月龍旆六轡至自京師閩越舊風
機巧剝輕資貨產利與巴蜀埒富猶無諸餘善之遺
俗號曰難治公將治之也考禮正刑節用愛人頒賦
遣役必齊其勞逸視年豐耗量入以制用削去事之
煩苛法之掊剋者吏不奉職民不帥教則懲以薄刑
俾寢遷善繇是民知方矣公將安之也初哥舒晃反
書至公屢及於門遽命上將帥戈船下瀨之師西與
鍾陵軍會先拔循潮二州以援番禺推誠誓衆士皆
奮勇旣而大憝就戮五嶺底定民是以康繁我師是
賴人無姦宄寇賊之虞矣公將教之也考類官之制

作爲此學而寓政焉躬率羣吏之稍食與贖刑之餘
羨以補經營之費而不涵於民先師寢廟七十子之
像在東序講堂書室函丈之席在西席齒胄之位列
於廊廡之左右每歲二月上丁習舞釋菜三日公齋
戒肄禮命博士率胄子修祝嘏陳祭典釋菜之日美
器用幣籩豆在堂爵壘在阼公元端赤舄正詞陳信
是日舉學士之版視其藝之上下審問愼思使知不
足教之導之講論以助之八月上丁如初禮歲終博
士以選舉之勤情覃思之精麤告於公歛其才者進
其等而貢之於宗伯將進必以鄉飲酒之禮禮之賓

主三拊受爵於兩壺之間堂下樂作歌以發德鹿鳴
南陔由庚嘉魚南山有臺以將其厚意繇是海濱榮
之以不學爲恥州縣之教達於鄉黨鄉黨之教達於
衆庶矣公薨之二年太議按公叔發修衛國之班制
以交四隣故易其名曰文孔文叔其勤家風夙夜不
懈衛人銘其彝鼎以公尊教勸學德洽荒服乃奏謚
曰成詔贈禮部尙書而刻金石之禮則闕而未備今
也敢播德馨貽之無窮

其銘曰維公之文肅恭且仁宣力事君潤飾經術底
綏斯民惟公之武鯁寡不侮剛亦不吐率衆勤王戡

厥醜虜易俗移風經始頌宮百堵皆興孔堂崇崇四
科以班乃侯乃公秩秩祀典鏘鏘禮容大昕鼓篋學
士萃止褒衣乃履登降以齒從公於邁樂我泮水我
間我里講論資始比屋爲儒俊造如林縵胡之纓化
爲青衿公宜難老爲學司南斜日告凶實天匪忱勦
勦和鸞兮不聞遺音願言思公兮如玉如金鏤餘烈
於此石以策罷者之心

按三山志作李錡誤舊記作椅以大厯七年爲福
州刺史圖經云唐興天下翕然尙文神龍中州人
薛令之始登上第其後李錡常袞咸以崇學校勸

風俗爲意則錡之崇學校當在常袞之先而圖經
書李錡爲福州刺史唐書李錡傳乃於憲宗時爲
潤州節度使在元和二年相去七八十年不應合
爲一人則是興學校者爲福州刺史李錡也其獲
罪元和者潤州節度李錡也有兩李錡故重修學
記作李椅則非元和之李錡矣此去思碑郝志於
都督府儒學記重載此文殊誤

福州都督府儒學記

大厯

常州刺史獨孤及撰

按及字至之洛陽人天寶末爲華陰尉代宗召爲

左拾遺歷舒濠二州刺史賜金紫徙常州治尚平
易民皆安之見唐書及咸淳毗陵志此文列銜常
州刺史蓋在代宗時唐書稱其文彰明善惡長於
論議云

石佛像記 貞元六年

諸道石刻錄云唐四門助教歐陽詹撰郝志云在烏
石山南澗寺上方

輿地紀勝作南澗天王寺石像記

萬物闢闢各由襲沿無襲無沿而忽以然苟非妖怪
實爲珍慶斯石像者其珍慶歟始孕靈韞質兆朕未

見則峩峩巨石巖峭山立鎮郡城之前阜歷蓮宮之上界海若鞭而莫動天時泐而終固皇唐天寶八載五月六日清晝忽騰雲旁湧驟雨來集驚飈環駭旬旬杳冥雄雄者雷騖然中震迸火噴野大聲殷空岑嶺蹊踞潭洞簌蕩須臾風雨散雷雲收激劈輪囷斬焉中闢南委地以梯落北干霄而碣樹不上不下不西不東亭亭厥心隱出真像三十二相具八十種好備列侍環衛品覺有序莊嚴供養文物咸秩端然慈面嚴矣儀形似倚雪山而授法似開月殿以趺坐異矣哉不曰博聞乎未聆於既往不曰多智乎罔測其

所來且物之堅莫堅於石況高原廣袤又羣石之傑
一朝派剖中有雕琢其爲造石之初致有相而外封
乎其爲有石之後入無間而內攻乎噫不可以人事
徵請試以神化察巍巍釋氏發揮道精其身旣傾其
神不生等二儀以通變齊四大而有力教於時有所
頽靡人於教有所忸怩則爲不可思議以煦以吹故
示此無跡之跡難然之然俾知其我存存入我之門
經曰千百億化身蓋隨感而應茲身者則千百億之
一焉昔諸佛報現皆託於有命有命則有生有生則
有滅曷若因其不朽之物憑乎不動之基形旣長存

法亦隨是與夫爲童兒而出世假長者以來化元元之微則雖一永永之利則不侔可以禮足而悔罪寄影以安樂予則求福不同者焚香跪仰或從釋子之後故於巉巖之餘仞聊書其所由來貞元六年七月十五日記

按詹字行周泉州晉江人閩中第進士自詹始爲國子監四門助教三山志天寶八載五月六日驟雨雷震須臾晴霽亭亭石心湧出佛像三十二相八十種好列侍環衛歐陽詹記之

東山懷一律師碑

貞元八年

復齋碑錄云東山懷一律師碑唐皇甫政撰褚長文
正書邱悌篆額貞元八年四月十五日立輿地碑目
作懷一塔碑在閩縣聖泉院郝志云皇甫政懷一律
師碑未詳年月蓋未見復齋碑錄也碑云天降舍利
松不棲禽梁不巢燕池不生蛙庭不生草凡爲六奇
見三山志

按皇甫政大厯間任節度觀察留後見郝志

愛同寺西院大律師碑

貞元八年

諸道石刻云唐劉太真撰于嶺書貞元八年立在閩
縣

案太真宣州人史稱其善屬文師蘭陵蕭穎士舉進士貞元四年曲江詩宴帝自第之太真爲上見唐書于頔字允志河南人貞元初出爲湖州刺史見顧渚山題名十四年拜山東道節度使此當爲刺史時所書

席相北樓記

貞元九年

輿地碑目貞元初歐陽詹撰在泉州

四門集釋名曰樓瞽也謂其高明覲遠瞽瞍然也建於第宅則以閱園林有媚樹於雉堞則以警寇盜不虞故墨子曰城三十步一坐候樓百步一立候樓茲

樓者蓋此郡北墉之立候樓也卜築之始微而具之
袤不倍常廣唯再尋製造日遠土木力殆左塞右陟
上露下圯有年數矣邦牧安定席公貞元七年下車
至九年月之三祀重民力而未形言是年暮秋歲豐
農隙有司率常典告有事於土功公曰斯郡國之南
極也元后帝鄉實在於北詩不云乎心乎愛矣遐不
謂矣欲因戀主向方瞻矚唯北有樓半傾半摧日夜
闕登陴擊柝之所風雨憂折榱復隍之患政因時令
爾其營之俾有布席跪立之地間更人防卒之蒞事
予將時躋展北面拱辰之心焉而受命者感公之意

如公之意野人郡庶感公之誠如公之誠川朝子來
壞崩易蠹趾有餘而不剗基塹自延材有長而不剪
棟宇自崇旣望庀徒未晦成功倚層霄於軒檻納千
里乎牕牖如鱗之解署若岸之軍壁得之之狀若述
山之有重巒長江之蹙洪濤氣勢繇是以雄焉公每
子牟情來莊舄思至俯仰於斯徘徊於斯夫完城壯
邑有邦之本也戀闕愛君爲臣之節也善矣哉公廣
茲樓也遠得有邦之本近貞爲臣之節執邦之本曰
公謹臣之節曰忠惟公與忠公斯昭矣小子家在委
巷多聞輿頌藝忝儒術每侍公居上志下衷兩獲而

達敬書其事爲之記以獻至若眺四維之雲物臨萬井之煙景遐象佳致眸莫勝觀非公有樓之素故不之載貞元九年秋九月三十日獻

案記云安定席公貞元七年下車姜公輔有寄泉南席使君詩郝志有傳北樓戍樓也後王十朋重修之

二公亭記 貞元九年

輿地碑目唐歐陽詹撰在泉州

四門集勝屋曰亭優爲之名也古者創棟宇纔御風雨從時適體未盡其要則夏寢冬室春臺秋戶寒暑

酷受不能自減降及中古乃有樓觀臺榭異於平居
所以便春夏而陶堙鬱也樓則重構功用倍也觀亦
再成勤勞厚也臺煩版築榭加欄檻暢耳目達神氣
就則就矣量其材力實由有蠹近代製古增妙者更
作爲亭亭也者藉之於人則與樓觀臺榭同製之於
人則與樓觀臺榭殊無重構再成之糜費加版築欄
檻之可處事約而用博賢人君子多建之其建之皆
選之於勝境今年暮春月邦牧安定席公別駕置同
正前相國天水姜公念茲邦川迥溟渤山連蒼梧炎
氣時迴溼雲多來又日臨胃次斗建辰位和氣將徂

畏景方至月令云可以升山陵可以居高明蓋謂是月況地理卑痺而不擇爽塏以蕩夫汚虛乎因問俗相原隰郭東里所共得奇阜高不至崇卑不至夷形勢廣袤四隅若一含之以澄湖萬頃揖之以危峯千嶺點圓水之心當奔崖之前如鏡之鈕狀鰲之首二公止旌輿以回睇假漁舟而上陟暮烟茵草翫憚移日心謀意籌有建亭之算而未之言也二公旣同邑人踵公遊於斯者如市登中隆觀媚麗前來後至異口同聲曰漢帝不曰百姓安其田里而無愁怨之聲者其由良二千石乎是故政平教成使俗泰而民以

甯者也虞書不日股肱良哉庶事康哉是謂翼帝藩
皇調陰序陽使物阜而民以昌者也席公今日之化
育吾徒是以甯姜公昔歲之弼諧吾徒是以昌且以
之甯又以之昌愷悌君子也詩曰愷悌君子民之父
母二公者真吾父母矣今茲阜二公攸選尙而加愛
務休訟簡必復斯至上露下蕪忍令父母憩之乎遂
偕發爲公就亭之如墻而前陳誠於縣尹允其請而
爲之辨方經蹠等周環當上頂誠奢訓簡以授子來
於是家有餘糧圃有餘木或掬一坯土焉或剪一枝
材焉一心百身蜂還蟻往榛莽可去以自薙耳簪無

脛而奔萃一之日斤斧之功畢二之日圻墁之庸息
再晨而成二公莫知層梁亘以中豁飛甍翼而四翥
東南西北方不殊致糊白墳以呈素腹頽壤而垂綰
通以虹橋綴以綺樹華而非侈儉而不陋烟水交浮
巖巒叠迴精舍奉其旁達都城企其遐際容影光彩
搖漪入瀾指朱軒於潭底閱雲岑於波裏熿熿油油
如飛若動又釣人飄飄於左右遊禽出沒乎前後一
眄睠千趣萬態稅息之者若在蓬壺方丈之上二公
重清曠於舊賞納忠懇乎羣庶尋幽採真常於斯勞
賓祖客常於斯加以平疇閒闊通塗在下可以親耕

樽可以採謳謠作一亭而衆美具應天造茲阜其固
與人爲亭歟不然何以遠郭郭而博敞詭秀之若此
非常之地意待非常之人故越千萬祀而至二公方
覲也邑人想之復言曰事無隱義物有正名地爲二
公而見亭從二公而建斯亭也可署曰二公亭雖芻
蕘之云中實有謂二公不忽遂以爲號小子藝忝于
文曾觀光上國去之日歷越遊吳歸之辰踰荆泛漢
會稽之蘭亭姑蘇之華亭襄陽峴首豫章湖中皆古
今稱爲佳境或棟宇猶在或基址未沒山川物象逼
得而覽方之於此遠有慙德懿哉二公智周德厚卜

地如此感民若彼詹非飾說入吾邑者升吾亭者知之古之製器物造宮室咸有銘頌以昭其義斯亭也豈無敦古而爲之章句者小子薄劣不敢議其事粗述其旨姑爲之記兼借二公之名於記左以爲邦榮在位元寮亦以次序從公而列貞元九年三月二十五日記

秦貞元九年三月郡牧席公別駕姜公得奇阜二公建亭邑人編曰二公亭詹爲是記見輿地碑目席相新六曹都堂記貞元十年

輿地碑目貞元十年歐陽詹撰今謂之僉廳在泉州

四門集貞元八年刺史安定席公爲邦之二祀冬造
六曹之都堂公表微而慮遠也天子建六官以紀綱
天下分四史六司用經緯封中猶天之有四時而人
之有四肢一時不若則歲罔成功一肢不和則體莫
全用公以六司之掾如股肱思安之與身之安也火
流定中將壞城郭親覽解宇首視斯署旣隕而隘非
凝神揆務之所日撫人民不則有國營宮室是亦爲
政乃量羨府以度用指斯宇而命易又曰處湫居卑
非智也煩人蠹財非仁也吾欲全行而就智藏事者
志之有司於是審基趾程廣袤山節藻稅僭也削而

不取土階茅櫚逼也革而是捐非約非豐允執厥中
然後計其材量日力山木則訓之如市人功則稅之
若時樂民願未旬而畢飛梁三道而通負連棚六接
以都豁陽軒退引陰室旁啟揖以重屏翼以迴廊掩
黔黔以秘邃屹崇崇而宏敞夏處其達則炎天以涼
冬居其隩則淒風以溫足以甯肌靜心釐厥職者也
夫哲人有作不唯利身在利人不唯利今在利後相
斯堂者公侯卿士禮隔殊品公不之降也斯不亦利
人不唯利於身歟堅壯固護存延千祀人不之逮也
斯不亦利後不唯利於今歟視斯堂見公之意時某

處某乙爲司功某處某乙司戶司倉司法司兵司田
皆外莊內融懷材抱忠無同邪以蒞下有譽謬以承
上當時之彥也請列於記左庶後之君子覩名訪德
知夫是日堂有人焉建堂之明年記

鱣溪廟記

貞元十年

見三山志王翊以貞元八年出爲福建觀察使十年
因所得雨爲此記寰宇記鱣溪在福州東鼓峯其潭
有鱣長三丈餘今爲祈禱之所

無垢淨光塔銘

貞元十五年

皇帝降誕日爲國建無垢淨光塔銘并序

攝觀察推官宣義郎前行秘書省校書郎庾承宣
撰

昔如來以善惡無所勸爲之說因果修因果者無所
從爲之存像教像教設而功德爰立因果著而報應
彰明至於聚沙而獲多福矧由旬縱廣之高大其功
德曷可思量哉惟唐貞元己卯歲孟夏四月旬有九
日聖君降誕之辰也煌煌乎溥天之大慶率土之盛
事窮祥絕瑞畧而不談人神幽贊品類歡樂邇自京
邑達於海隅各獻珍寶以賀昌運先是觀察使柳公
監軍使魚公相與言曰聞夫西方之聖者口

缺一字崇

福之本至仁之教故報君莫大於崇福崇福莫大於
樹善樹善莫大於佛教教之本其在浮圖歟伏以今
皇帝道邁往初澤漸無垠天下之人登壽域樂太平
者二十有一年於茲矣含氣之類尙猶知感矧臣子
之心復當於茲辰焉於是會釋徒謀建置作爲浮圖
以塔名心夫塔者上參諸天下鎮三界影之所蔭如
日月之照破昏爲明鈴之所響如金石之奏聞聲生
善如是諸福盡歸今上謀之旣臧相顧踴躍願力口
缺一字 果事無不諧齋心至誠三卜皆吉相地面勢依
山憑高標勝槩於南方跨上游於福地食王祿者樂

於檀施荷帝力者悅而獻工役無告勞工用斯畢皇

帝嘉焉御札題額銘名貞元無垢淨光之塔屹然峻

□□_{字缺二}立雲外露盤而星象可接金榜而鸞鳳交

馳從何處生如踊諸地比金剛而難壞與劫石而齊

堅取舍利以寘其中□□_{字缺一}本□□_{字缺一}以表其外俾

夫觀覽者名号斯識瞻禮者利益居多異夫經營之

初塋塋之始周其基陟下現盤石五色□□□□□

□□_{字缺六}意將靈祇先有所待盤石之上又生異表瑩

徹冰淨淋漓玉顏如物之牙粲然攢植訖諸博議得

未曾有非□□□□_{字缺二}孝之感動神祇之協贊則何以

有斯靈異乎況河東公以仁德鎮撫海隅庥安魚公

以忠貞□□□□

缺四字

師□

缺一字

輯睦二臣協心一

方康甯建彼崇塔赫然丕續上以資大君無疆之福

下以遂蒼生□□□□□□□□□□

缺九字

亦至矣壺

刊諸貞石以示於將來小子備從事之末奉銘敘之

命豈知竺乾之道空爲□□□□□□□□□□

缺十

字下爲銘詞
碑中另擡寫

瞻彼靈塔巍巍崇崇疑自地踊若將天通作鎮海隅

高標閩中影護下界形儀太空金盤納景□□□□

□□□□

缺入字

贊茲盛功侯其建之臣子之忠□□□□

缺二字
福之聖壽無窮

貞元十五年歲次己卯

下缺

福建等州都團練觀察處置等使朝請大夫使持

節都督福州諸軍事守福州刺史兼

下缺三山志作御史中丞

柳冕

福州監軍使朝議郎行

三山志誤作侍

內侍省內府局丞

員外

缺一字三山志作置

同

誤作司

正員上柱

缺二字

緋魚袋

此上九字三山志誤作遷字

魚

下缺三山志作獻字

諸道石刻錄云唐庾承宣撰無書人名氏篆額貞元

十五年四月立

通志云在石塔寺唐貞元十五年己卯歲四月十九日德宗誕辰觀察使柳冕建塔九層賜名無垢淨光塔攝觀察推官宣議郎前行秘書省校書郎庾承宣撰

錢大昕金石文跋尾右貞元無垢淨光塔今在福州府按三山志云石塔寺在福州西南貞元十五年德宗誕節觀察使柳冕以石造塔賜名貞元無垢淨光塔庾承宣爲記卽此碑也碑末題福建等州都團練觀察處置等使朝請大夫使持節福州諸軍事守福州刺史史字以下皆闕以三山志證之知所闕者爲

兼御史中丞及柳冕姓名也次一行題監軍使朝議
郎行內侍省內府局丞員外置同正員上柱國賜緋
魚袋魚獻獻字剝落止存右一筆今據三山志補之
志所書魚獻獻結銜字多譌脫文又當據碑爲正耳碑
中基址字避諱作基與慈恩寺基公塔銘正同

王昶金石萃編按碑云貞元己卯歲孟夏四月旬有
九日聖君降誕之辰唐書本紀德宗以貞元二十一
年正月崩年六十四推其生在天寶元年至貞元己
卯年五十八寺僧爲皇帝誕辰建造浮圖僅見此碑
當時佛教流行天下以建塔寓祝釐之意當不止一

處而福州距京師遠數千里僻處海隅此碑獨流傳
至今撰文者庾承宣無傳書者柳冕字敬叔博學富
文辭貞元十三年兼御史中丞福建觀察使此碑正
在福建時也冕官福州置萬安監索部內馬驢牛羊
畜牧之民間怨苦坐政無狀代還然則碑稱其以仁
德鎮撫海隅底安者亦過譽矣

孟超然瓶菴居士文鈔云徐興公榕陰新檢言貞元
無垢淨光塔寺廢久碑猶存闔閩間嘗偕陳伯孺曹
能始往讀猶可以意會之是明萬厯此碑猶存也而
國初潘稼堂遊閩已不可得見矣往歲同林育萬孝

廉龔維廣進士遊石塔寺二君爲石塔碑刻記累數
千言亦嘆此碑不可得維廣據三山志以爲王延義
所建石塔卽此地而貞元塔之毀亦據志當在黃巢
亂時乾隆四十有五年庚子秋聞學使大興朱竹君
先生思爲閩金石志其門下士爲遍搜舊刻忽得此
碑於石塔寺樓房中余攷鼓山遍照和尚自敘云乾
隆二十六年癸未購石塔東民房爲塔院造樓一所
額曰冥晦清齋卽石塔寺也此碑夾板壁中覆以樓
樓下爲僧臥室從無入者樓旣撤龜趺螭首巋然巨
觀碑文大半完好不止如興公所云可以意會者而

遍照之不早出是碑爲可恨也抑此地舊爲貞元塔院兵燹之後久爲民居闕數百年建塔院者又適於此地乃使此碑復出亦有數存乎其間未可知也

鄭杰曰右唐貞元無垢淨光塔碑在今塔西十許武僧寮複壁中故物色罕有及者今歲孟夏旣刊塔記成因念曹能始先生名勝志及徐興公播稼堂諸記述皆言此碑見存遂往搜訪久乃得之碑約高一丈二尺寬四尺四寸雙螭首龜趺額篆敕貞元無垢淨光塔銘九字分三行行三字碑中分二十三行行二十四字碑文末段剝蝕爲甚然總計缺裁五十餘字

其末二銜以三山志考之首銜兼字下當爲御史中丞柳冕六字次銜三山志載爲監軍使朝議郎侍內侍省內府局丞員外置司遷魚獻以今碑考之則上侍字當從碑作行員外下缺一字當從志作置司字當從碑作同遷字當從碑作正員上柱口口緋魚袋九字獻字又當從志夫金石之壽最久然非得好古者爲之表章則委逸不少矣此碑自曹徐潘三家見後已百餘年乃今復出於世顯晦之迹固有時哉

按承宣與韓愈李觀李絳崔逢王涯馮宿歐陽詹聯第舉進士時傳龍虎榜見唐書魚獻爲福州監

軍使見黃志

馬懿公壁記

元和二年

輿地碑目元和二年馬懿撰

案贛州刺史廳壁記云元和四年摠自泉州移贛
則二年正知泉州時

東山愛同兩寺義食堂畫壁記

元和四年

諸道石刻錄云唐馮審撰顏顥書篆額元和四年立
輿地碑目作羅漢堂記在大乘愛同寺三山志云大
乘愛同寺六年置大乘十二年置愛同異居同食日
愛同會昌廢大中十一年復之合爲一此兩寺義食

所以有堂也寶刻類編作賀蘭岐書

雷篆 元和五年

閩書石銘者太平廣記載宣室志云泉州之南有山焉峻起壁立下有潭水深不可測周十餘畝中有蛟螭常爲人患人有悞近或馬牛就而飲者輒爲吞食泉人苦之有年矣由是近山居者咸挈引妻子遠徙逃患元和五年一夕聞山南有雷暴震數百里若崩山之狀一郡驚懼里人抱牛馬雞犬俱失聲仆地屋瓦交擊木樹顛拔自戌及子雷電方息旦往視之其山摧墜石壁數百仞殆盡俱填其潭水溢流注滿四

野蛟螭之血若遍立黃而石壁之上有鑿成文字一
十九言字勢甚古郡中士庶無能知者自是懼者渙
息遷者歸還結屋架廬接比其地郡守因之名其地
爲石銘里蓋因字爲銘且識異也後有客於泉者能
傳其字持至東洛故吏部侍郎韓愈自尙書郎爲河
南令見而識之其文曰詔口黑視之鯉魚天公昇殺
人牛壬癸神書急急然則詳究其義似上帝責蛟螭
之詞令戮其害也其字則蚪斗篆書又云漳泉接境
縣南龍溪界域不分古來爭競不決忽一年大雷雨
霹靂山石裂壁口刻字漳泉兩州分地太平萬里不

三
惑千秋作程南安龍溪山高氣清其文猶可識又云
唐開元中漳泉二水分疆界不均互訟於臺制使不
能斷迨數年詞理分亂終之莫決於是州官焚香告
於天地山川以祈神應俄雷雨大至霹靂一聲崖壁
中裂所競之地拓爲一逕高千丈深僅五里因爲古
道壁中有古篆六行二十四字皆廣數尺雖約此爲
界人終莫識貞元初流人李協辯之曰漳泉兩州分
地永安龍溪山高氣清千年不惑太平萬古作程所
云永安龍溪者兩郡界首鄉名也

毬場山亭記

元和八年

復齋碑錄云唐毬場山亭記馮審撰分書無姓名篆額元和八年立

輿地碑目元和八年馮審記

案三山志唐元和八年刺史裴次元於其南闢爲毬場卽山爲亭作詩題於其壁自爲序大畧云場北有山雜石巖巖峯巒巉峭聳其左林壑幽邃在其右是用啟滌高深必盡其趣建創亭宇咸室其宜勒爲二十詠有望京山觀海亭雙松嶺登山畧天泉池阮琴臺筋竹巖枇杷川荻蘆崗桃李塢芳茗原山陰亭合清洞紅蕉平越壑橋獨峯篋管塢

八角亭盤石椒白土谷詩各一章章八句內望京
山積高依郡城迥拔凌霄漢蓋取以望京名之也
時觀察推官馮審爲記刻石大畧言次元報政之
暇燕遊城之東偏曰左衛營遂命開治化磽确爲
坦夷去荆棘於叢薄以爲毬場其北乃連接山麓
翳蒼荒榛公日一往或再往焉捫蘿躡石不憚危
峭轉石爲峯巒出溶坳而池塘見爲潭爲洞爲島
爲沼窈窕深邃安可殫極凡二十有九所聲於歌
詠者二十篇蓋又有漣漪亭東陽坡分路橋乾崗
岑木瓜亭石堤椅海榴亭松筠陌夜合亭未爲詩

也至大中十年亭壁之詩已無存者刺史楊發訪於邑客得其本爲鐫諸碑陰而識之其後碑石湮沒皇朝熙甯二年夏新子城役人哀土於宣毅營北將軍山下得之乃輦而置於郡中日新堂之西廡有程太卿師孟題記按此則場北云云是次元自序并詩題壁之文非審記文也通志以序文爲記誤矣

按次元以元和六年爲觀察使八年薛謩爲中丞是記蓋去後立也審字退思元和間任福建都團練處置使推官作記當在此時楊發字至之宣宗

時爲蘇州刺史徙福建觀察使以能政聞見唐書

黃志職官楊發大中間任福州刺史

賈島章敬國師碑銘 元和十年

權德輿撰賈島書在浮峯山

閩書師懷暉姓謝氏東晉流寓今爲泉州人孩提秀
發博究書術一旦慨然曰我之祖先今安在耶四支
百體視聽動用孰使然耶濯然雨泣改服緇褐志在
楞伽行在曹溪得圓明清淨之本去妄想因緣之習
百八句義照其身心心離文字化無方所於是抵清
涼下幽都登徂徠入太行所至之邦被蒙法未止於

太行百巖寺門人因以百巖爲號焉元和三年有詔徵至京師宴坐於章敬寺每歲召入麟德殿講論後以疾固辭十年十二月二十一日恬然示滅其年六十其夏三十五弟子智朗志操等以明年正月起塔於瀟陵原凡一燈所傳一雨所潤入法界者不可勝書

聖泉院記

見三山志

案鄭氏通志金石畧聖泉寺三碑內一碑于頔書今三碑目並存不知于所書何碑也

聖泉寺碑

太和四年

在聖泉寺唐景龍中僧懷一鑿池得泉劉軻爲記按諸道石刻錄云聖泉寺法華院記唐劉軻撰太和四年立碑三面皆刻字輿地碑目作東山聖泉法華院記

案唐摭言劉軻慕孟子文故名少爲僧止於豫章高安之果園旣成進士登第文章與韓柳齊名

石鼓石刻

開成

在邵武縣石鼓山下溪中唐開成中銅川廖懋監昭武鎮西溪山縈繞遊而樂之一日驟雨溪漲出一石

狀如鼓因刻石鼓二字於上今在溪北岸懋卒民葬於石鼓之右

按廖懋郝志失攷

木龍贊

會昌四年

晉江縣木龍巖相傳有古木根蟠如龍唐歐陽柎得之作贊曰三瀑亭下亂薪堆中顧是榜斲分茲窪僻質奇狀古腿蚺豆虎英士屢瞻高人驚睹光華密緻式玩悅志葉公畫情武侯卧意夭矯蜿蜒勢若騰天疑將孕雲神化修然欲脫塵俗攜之高舉木刻會昌四年仁澤記稍北另有同遊題名刻石共第一人曰

球仁澤清祐泉州府志太守蘇球作木龍贊刺史蘇球以會昌元年六月任泉州清源郡四年十月轉溫州正與木龍攜歸北留贊於石二語合據此則仁澤卽球字而作贊非柅明矣按柅字降之詹之從子開成進士蘇球郝志職官失攷

新造上生院記

大中六年

輿地碑目上生院記在福州西南烏石山大中六年復齋碑錄云唐李貽孫撰正書無名大中六年四月十三日立在神光寺

案李貽孫以大中六年爲福建團練副使見三山

志

下邳林夫人墓志

大中九年

孫星行訪碑錄唐褚符撰正書大中九年十月立在

閩縣

篆額

有唐故下邳林氏夫人墓志

有唐故下邳林氏夫人墓志

并序

河南褚符撰

夫人林氏其先下邳郡人也曾祖□皇任廣州參軍
祖景師皇任潮州刺史父□性貞介薄祿爵甘退□
身□不束於名宦鄉里咸謂之高明靜□士者夫人
則府君之仲女也未笄而柔和冰潔既聘而德行蘭
馥山親族□鄉黨□例以□約也不逾□而閩中大

族富巷孫氏子以斧□□作□□婦執勞媒□節以
□□繇是□夫人□□得以信之禮得□配之□孫
未期而隣箴里感州□縣響俾□慈□仁柔繩□□
標□□□□□□□有男二人曰愿曰鄉愿業開
元禮未冠赴舉人比孺悲拜□□出□申□月行次
□嶺忽然中疾顏子不壽□□悲也□總□□□□
□□□□□□□□知之文行爲時詰周嘆翔
翥異鸞鶚交彩仁□誼如□□□□眞夫人之令子
也女三人長曰大元娘適太原王氏仲□□□□
而卒季曰□娘適潁川陳氏懿哉三女□□□□

□□□□□□□□之□□夫人之□鳳池鄉黨
之□□□□□□是□以大中七年十二月二十
三日□時□於□□□□□□□□得年四十八
歲以大中九年十二月十日□□□□孝□鄉□□
□□□□□□□□□□□□□□□□□□□□
□□□念男女之□□□□□□□□□□□□□
□□□□□□□□述銘曰□鳥翻兔奔□破林昏□
□□□□□□□□化□□□□爲根□□□嘆維人
可□倚與夫人婦道□□母儀□□□□□男
貞女孝惟順之方□□□□□□□□不□□□□

□□□□墳義義於山之旁懿德美行不隨魂揚高山有碣雕琢無妨□□□□之用藏墳摧世更陵谷改張此石若出斯文更昌

孟超然曰銘詞云墳摧石出奇矣考唐元和十年內侍李輔光葬咸陽東北近涇萬厯中涇岸崩壙水三日不流乃得輔光墓志石爲崔元畧撰銘曰水竭原遷斯文乃傳碑文言其子愿業開元禮人比孺悲按唐初有貞觀顯慶禮至明皇乃爲開元禮其書吉禮七十五卷賓禮二卷軍禮十卷嘉禮四十卷凶禮二十卷合序例三卷共一百五十卷其降凶禮於五禮

之末蓋以從前許敬宗李義府等以凶禮非臣子所
宜故削去國恤一篇至於開元亦不能復也時以開
元禮設科取士習是禮者先授太常官以備講論爲
士子出身之資然卷帙繁富而難讀故習之者亦寡
愿未冠而習開元禮赴舉可謂賢矣魯哀公使孺悲
學士喪禮於孔子故云人比孺悲也

案此碑孟超然於乾隆三十九年得之福州西郊
鳳凰山池側石平如砥長三尺廣二尺爲移石置
鳳凰山將軍廟越七年庚子朱竹君學使移之福
州府庠鄉賢祠考銘詞墳摧世更陵谷改張此石

若出斯文更昌墓毀石出若有數存與保母甄同
爲石墨故事今剝蝕僅存數十字矣

閩遷新社記 大中十年

集古錄濮陽之撰八分書大中十年立文見郝志

大中十年夏六月公命遷社於州城凡築四壇壇社
稷其廣倍丈有五尺其高倍尺有五寸主以石壇風
師其廣丈有五尺其高尺有五寸壇雨師廣丈而高
尺自初獻迄終獻專一室有厦橫附二室皆南鄉備
犧幣西鄉之楹凡二室龜磚瘠道凡十有三條其繁
折則三百九十有七尺繚垣凡百堵其高逾尋苞巨

榕凡二十本南北行延崇甕展階揭雙扉以束鄉具
扁鑰焉其外北東闕二室有厦其南立雙表及建功
以十七日戊子起冬十一月庚子畢謹按閩壇坵南
邪西隙蚌蟹汚蟻負蒲葦之豪家禽野牧觸踐無禁
至祈報時率戒閩侯官責辨與胥華庄權事其晴也
雖重營不免於濡瀉其雨也必撐篷以護瀆神勞人
未嘗有寤者元侯關西公旣蒞閩其春由郡儀卽社
喟然顧曰吾口鄉里蘇厥壇惟更仍歲穰穰蘇人宜
之今閩饒訛期將丕革首在茲乎由是擇謹事者行
故壇西躬取其地受之節餼嚴帑非隱者除鳩工以

棹畚斲材以陶坯肩有歡謠杵無怨築故擘錢垂十
萬不徭一丁不斂一戶而爽潔開拓四壇鏤焉夫遷
社於州坤右位也不書稷風雨尊社也禮稱諸侯爲
百姓立社曰國社而厲山氏之農棄緇隆焉共工氏
之後土勾龍兼饗風秩雨斑光照舊典蓋先聖王尊
以示本均以行政未之改也惟我元侯敬恭乎上撫
臨於下戢苛難慢顯晦咸甯繁條陰森如肅其饗自
然克靈克序德致元侯而施於一方也是月牙將翁
行全牘其績歸成於公公曰壇倚浮屠祠爭出眉睫
吾患將來有醉浮屠或易於遷徙焉苟非鐫琢則本

末無所彰遂以記徵百僚之不得辭且拜命之辱
謹用二十九日戊辰獻記

集古錄目唐攝館驛巡官前進士濮陽公撰書爲八
分不著名氏福州刺史楊君

碑不著名

改立新社稷風雨

壇遂記其壇墼室宇之制碑以大中十年十一月立
集古錄云其詞曰大中十年夏六月關西公命遷社
於州城凡築四壇壇社稷廣倍丈有五尺其高倍尺
有五寸主以石壇風師廣丈有五尺高尺有五寸壇
雨師廣丈而高尺云文字古雅甚可愛嗚呼唐之禮
樂盛矣其遺文有足采焉州縣社稷有主見於此記

蓋大中時其禮猶在也按唐書楊發自蘇州刺史爲福建觀察使至大中十二年遷嶺南節度以歲月推之關西公者楊發也

毬場山亭二十咏并序

大中十年

諸道石刻錄唐福州刺史裴次元作大中十年刻據寶刻叢編二十咏有序郝志但云二十咏畧也此卽楊發所刻序文見前按發以大中十年徙福建觀察使碑陰稱大中十年十月都團練觀察等使楊發

桃林場碑記

大中十五年

輿地碑目桃林場記唐大中十三年盛均撰閩書云

縣令陳知柔述之唐長慶二年析南安置桃林場大
中間盛均撰文碑目作大中十三年誤

唐武宗二年余還斯境其場由西十里右脇精廬前
距危岫形拘勢促不似公門故其人輕而險其官屑
而殘時非厭遷殆有數也今己卯年觀季父於此視
塵里若巨邑覽風物如大邦鱗鱗然厩宇之羅靄靄
然烟火之邦一派趨碧羣峯走青橫飛而野鶴沖疲
曠望而晴郊遠去是以俗阜家泰官清吏閑凌晨而
肩車競來度日而笙歌不散故知興廢有時吉凶由
邇不然何勞於舊宇而逸於新亭耶吾友王顥字還

古鷺泊未遷祿爲親屈莫邪曾試犀象無全是年冬
枉車再至蓋有爲也先是知余謀展覲驟謁簾幃去
纔旬月歸諸素志知還古不日青雲暫適我願耳徒
服其所刊變風易俗嘗聞期日之內變爲大縣乎亦
是斯場人士之所願也其他故事前記已詳其或加
予未可無述大中十五年十二月

案桃林場卽今永春州盛昭州記稱其俗阜家泰
官清吏閑舟車競來笙歌不散見閩書宋陳知柔
陳春縣記謂縣作於唐寶曆元年名勝志載永春
縣記宋開寶二年立與舊志閩書不合按輿地紀

勝引寰宇記唐長慶二年析南安置桃林場閩升
爲桃源縣長興元年改爲永春縣當以此爲正盛
均字之才永春人大中十一年進士終臺州刺史
知柔字體仁號休齋郝志未著永春縣令之名

復雲峯院碑

大中

撰人闕在福州

大中寺額

大中

寶刻類編柳公權書在惠安縣雲峯西下有大中寺
唐宣宗賜額柳公權書

柳公權書

輿地碑目晉江縣瑞峯院有閣榜曰瞻部靈源之閣
相傳柳公權書而烏雀不敢棲其上

閩中金石志卷一終